

四庫全書

子部

欽定四庫全書

太平御覽卷九十八

宋 李昉等 撰

皇王部二十三

西晉懷帝

愍帝

東晉元帝

明帝

成帝

懷皇帝

晉書曰孝懷皇帝諱熾字豐度武帝第二十五子也光熙元年封豫章郡王屬惠帝之時宗室構禍帝沖素自守門絕賓遊不務世事專玩史籍有譽於時初拜散騎常侍及趙王倫篡見收倫敗為射聲校尉累遷車騎大將軍都督青州諸軍事未之鎮永興元年改授鎮北大將軍都督鄴城守諸軍事十二月丁丑立為皇太弟帝以清河王本太子也懼不敢當典書令廬陵修肅曰二相經營王室志寧社稷儲貳之重宜歸時望親賢之舉非

大王而誰清河幼弱未允衆心是以既升東宮復贊藩國
今乘輿播越二宮久曠常恐氏羌飲馬於涇川螳衆控
弦於瀟水宜及吉辰時登儲副上翼大駕早寧東京下
允默首顙顙之望帝曰卿吾之宋昌也乃從之光熙元
年十一月孝惠帝崩羊皇后以於太弟為嫂不得為太
后催清河王覃入已至尚書閣侍中華混等急召太弟
癸酉即皇帝位大赦皇后羊氏為惠皇后居宏訓宮追
尊所生太妃王氏為皇太后立妃梁氏為皇后十二月

南陽王模殺河間王顥於雍谷永嘉元年春正月癸丑朔大赦改元除三族刑以太傅東海王越輔政三月辛巳東萊人王彌起兵反寇青徐二州三月庚午立豫章王鈐為皇太子辛未大赦庚辰東海王越出鎮許昌五月馬牧帥汲桑聚衆反敗魏郡太守馮嵩遂陷鄴城害新蔡王騰燒鄴宮火旬日不滅入掠平原山陽公劉秋遇害洛陽步廣地里陷有二鵝出色蒼者冲天白者不能飛秋七月己酉朔東海王越進屯官渡以討汲桑己

未以平東將軍琅瑯王睿為安東將軍都督揚州江南
諸軍事假節鎮建業八月己卯朔撫軍將軍荀晞音敗
汲桑於鄴十二月戊寅并州人田蘭簿盛等斬汲桑於
樂陵甲午東海王越矯詔囚清河王覃於金墉城癸卯
越自為丞相以撫軍荀晞為征東大將軍二年春正月
丙子朔日有食之丁未大赦二月辛卯清河郡王覃為
東海王越所害冬十月甲戌劉元海僭帝號於平陽仍
稱漢三年三月丁巳東海王越歸京師己丑勒兵入宮

於帝側收近臣中書令繆播帝舅王延等十餘人並害之丁卯大旱江漢河洛皆竭可涉九月丙寅劉聰寇浚儀遣平北將軍曹武討之丁丑王師敗績東海王越入保京城聰至西明門越禦之戰於宣陽門外大破之使車騎將軍王堪平北將軍曹武討劉聰王師敗績堪奔還京師劉聰攻洛陽西明門不克冬十一月石勒陷長樂安北將軍王斌遇害因屠黎陽乞活師李憚薄盛等帥衆救京師聰退走憚等又破王彌於新汲四年十月

壬子以驃騎將軍王浚為司空平北將軍劉琨為北平大將軍京師饑東海王越羽檄徵天下兵帝謂使者曰為我語諸征鎮若今日尚可救後則無逮矣時莫有至者十一月甲戌東海王越帥眾出許昌以行臺自隨宮無復守衛荒饑日甚殿內死人交橫府寺營署並掘塹自守盜賊公行桴鼓之音不絕越軍次項自領豫州牧鎮東將軍周馥遠迎大駕遷都壽陽越使裴頠討馥為馥所敗走保東城請救於琅瑯王睿五年春正月帝密

詔苟晞討東海王越罪狀告方鎮討之以征東大將軍苟晞為大將軍景子東海王越薨五月進司空王浚為大司馬琅琊王睿為鎮東大將軍東海王越之出也使河南尹潘滔居守大將軍苟晞表遷都倉垣帝將從之諸大臣畏滔不敢奉詔且宮中及黃門戀貨財不欲出至是饑甚人相食百官流亡者十八九帝召羣臣會議將行而警衛不備帝撫手歎之曰如何曾無車輿乃使司徒傅祗出詣河陰修理舟楫為水行之備朝士數十

人導從帝步出西掖門至銅駝街為盜所掠不得進而還六月癸未劉曜王彌石勒同寇洛川王師頻為盜賊所敗死者甚衆庚寅司空荀藩光祿大夫荀組奔轅轅太子左率溫畿夷夜開廣莫門奔小平津丁酉劉曜王彌入京師帝開華林園門出河陰藕池欲幸長安為曜等所追及曜等遂焚燒宮廟逼辱妃后吳王晏竟陵王楙音茂尚書左僕射和郁等皆遇害百官士庶死者三萬餘人帝蒙塵於平陽劉聰以帝為會稽公荀藩移檄州

鎮以琅琊王為盟主豫章王端東奔荀晞晞立為皇太子自領尚書令具置官屬保梁國之蒙縣百姓飢儉米斛萬餘價八月劉聰使子粲攻陷長安太尉征西將軍南陽王模遇害長安遺人四千餘家奔漢中九月癸亥石勒襲陽夏至於蒙縣大將軍荀晞豫章王端並歿於賊六年春正月帝在平陽九月辛巳前雍州刺史賈疋討劉粲於三輔走之關中小定乃與衛將軍梁芬京兆太守梁綜共奉秦王鄴為皇太子於長安七年正月劉

聰大會使帝著青衣行酒侍中庾珉號哭聰惡之丁未
帝遇弒崩於平陽在位七年時年三十

晉陽秋曰懷帝天姿清劬少有聲名若遭承平之世足
為守文佳主而繼惠帝擾亂之後東海專政祿去王室
無幽厲之釁而有犬戎之禍悲夫

愍皇帝

晉書曰愍皇帝諱鄴字彥祺武帝孫吳孝王晏之子也
出繼伯父秦獻王東襲封秦王永嘉二年拜散騎常侍

撫軍將軍及洛陽傾覆避難於滎陽密縣與舅荀藩荀
組相遇自密南趣許潁豫州刺史閻鼎與前撫軍長史
王毗司徒長史劉疇等中塗復叛鼎追殺之藩組僅而
獲免鼎遂扶帝乘牛車自宛趣武關歸於長安頻遇山
賊士卒亡散次於藍田鼎告雍州刺史賈疋疋遽遣州
兵迎衛達於長安又使輔國將軍梁紆助守之時有王
龜出霸水神馬鳴城南元年九月辛巳奉秦王為皇太
子登壇告類建宗廟社稷大赦加疋征西將軍以秦州

刺史南陽王保為大司馬賈疋討賊張連遇害衆推始
平太守麴允領雍州刺史為盟主承制選置建興元年
夏四月丙午奉懷帝崩問舉哀成禮壬申即皇帝位大
赦改元以衛將軍蔣芬為司徒雍州刺史麴允為使持
節領軍將軍錄尚書事京兆太守索綝為尚書右僕射
五月詔琅瑯王曰朕以冲昧纂承洪緒未能梟夷凶逆
奉迎梓宮枕戈煩寃肝心抽裂前得魏浚表知公帥先
三軍已據壽春傳檄諸侯協齊威勢想今漸進已達洛

陽涼州刺史張軌乃心王室連旗萬里已到汧隴梁州
刺史張光亦遣巴漢之卒屯在駱谷秦州驍勇其會如
林間遣使適還具知平陽定問云幽并隆盛餘胡衰破
然猶恃險當須大舉未知公今所到是以息兵秣馬未
便進軍今為已進何許當須來旨便乘輿自出會除中
原也公宜思宏謨猷勛濟遠畧使山陵旋反四海有賴
故遣殿中都尉劉蜀蘇馬等具宣朕意公茂德昵屬宣
隆東夏恢融六合非公而誰但洛都陵廟不可空曠公

宜鎮撫以綏山東右丞相當入輔弼追蹤周召以隆中興也二年秋七月劉曜趙舟等又逼京都領軍將軍麴允討破之四年七月劉曜攻北地麴允帥步騎三萬救之王師不戰而潰北地太守麴昌奔于京師曜進至涇陽渭北諸城悉潰建威將軍曾充散騎常侍梁緯少府皇甫陽等皆死之八月劉曜逼京師內外斷絕鎮西將軍焦嵩平東將軍宋哲始平太守竺恢等同赴國難麴允與公卿守長安小城以自固散騎常侍華輯監京兆馮

翊弘農上洛四部兵東屯霸上鎮將軍胡崧師城西部兵
諸屯軍遮馬橋並不敢進冬十月京師饑甚米斗金二
兩人相食死者大半太倉有麴數十餅麴允屑為粥以
供帝至是復盡帝泣謂允曰今窘厄如此外無救援死
於社稷是朕事也然念將士暴離斯酷今欲聞城未陷
為羞死之事庶令黎元免屠爛之苦行矣遣書朕意決
以十一月乙未使侍中宋敞送牋於曜帝乘羊車肉袒銜
璧輿櫬出降羣臣號泣攀車執帝之手帝亦悲不自勝

御史中丞吉朗自殺曜焚觀受壁使宋敞奉帝還宮初
有童謠曰天子何在豆田中時王浚在幽州以豆有霍
殺隱士霍原以應之及帝如曜營營實在城東豆田壁
辛丑帝蒙塵於平陽麴允及羣官並從劉聰假帝光祿
大夫懷安侯壬寅聰臨殿帝稽首於前麴允伏地慟哭
因自殺五年春正月帝在平陽庚子虹霓彌天三日並
照平東將軍宋哲奔江左十一月劉聰出獵令帝行車
騎將軍戎服執戟為導百姓聚而觀之故老或歔歔流

涕聽後因大會使帝行酒洗爵反而更衣又使帝執蓋
晉臣在座多失聲而泣尚書郎辛賓抱帝慟哭為聰所
害十二月戊戌帝遇弒崩於平陽在位五年時年十八
帝之繼皇統也屬永嘉之亂天下崩離長安城中戶不
盈百牆宇頽毀蒿棘成林朝廷無車馬章服唯桑板署
號而已衆唯一旅公私有車四乘器械多闕運饋不繼
巨猾滔天帝京危急諸侯無釋位之志征鎮闕勤王之
衆故君臣窘迫以至弒辱

東晉元皇帝

晉書曰元皇帝諱睿字景文宣帝曾孫琅邪恭王覲之子也咸寧二年生於洛陽有神光之異一室盡明所藉藁如始刈及長白毫生於日角之左隆準龍顏目有精曜顧眄焯如也年十五嗣位琅瑯王幼有令聞惠皇之際王室多故每恭儉退讓以免於禍沈敏有度量不顯灼然之迹故時人未之識焉唯侍中嵇紹異之謂人曰琅瑯王毛骨非常殆非人臣之相元康二年拜員外散

騎常侍累遷左將軍從討成都王穎蕩陰之敗叔父東安王繇為穎所害帝懼禍及將出奔其夜月正明而禁衛嚴警無由得去甚窘迫有頃雲霧晦冥雷雨暴至微者皆弛因得潛出穎先令諸關無得出貴人帝既至河陽為津吏所止從者宋典後來以策鞭馬而笑曰舍長官禁貴人汝亦被拘耶吏乃聽過至洛迎太妃歸國東海王越之收兵下邳也假帝輔國將軍尋加平東將軍都督揚州諸軍事越西迎大駕留帝居守永嘉初用王

導計始鎮建業以顧榮為軍司馬賀循為參佐王敦王

導周顗

音擬

刁協等為腹心股肱賓禮名賢存問風俗江

東歸心馬及懷帝蒙塵於平陽司空荀藩等移檄天下
推為盟主愍帝即位加左丞相歲餘進位丞相大都督
中外諸軍事建武元年春二月辛巳平東將軍朱哲至
宣愍帝詔曰時遭屯否皇綱不振朕以寡德奉承洪緒
不能祈天永命紹隆中興至使凶胡敢帥犬羊逼迫京
輦朕今幽塞窮城憂慮萬端恐一旦崩潰卿詣丞相具

宣朕意使攝萬機時據舊都修復陵廟以雪大恥三月
帝素服出次舉哀三日西陽王秉及羣僚參佐州郡牧
守等上尊號帝不許秉等以死固請至於再三帝慨然
流涕曰孤罪人也唯有蹈節死義以雪天下之恥庶贖
鈇鉞之誅吾本琅琊王諸賢見逼不已乃呼私奴命駕
將反國羣臣乃不敢迫請依魏晉故事為晉王許之辛
卯即王位大赦改元大興元年春正月戊申朔臨朝懸而不
樂三月癸丑愍帝崩聞至帝斬綰居廬丙辰百寮上尊

號即皇帝位詔曰昔我高祖宣皇帝誕膺期運廓開王
基景文皇帝奕世重光緝熙諸夏爰暨世祖應天順時
受茲明命功格天地仁濟宇宙旻天不傭降此鞠凶懷
帝短世越去王都天禍薦臻大行皇帝崩殂社稷無奉
肆羣后三司六事之人疇諮庶尹至於華戎致緝大命
于朕躬予一人畏天之威罔敢稽違遂登壇南面受終
文祖燔柴頒瑞告類上帝惟朕寡德繼承洪緒若涉大
川罔知攸濟惟企股肱爪牙之位文武熊羆之臣用能

弼寧晉室輔予一人思與萬國共茲休慶於是大赦改元庚午立太子紹為皇太子永昌元年春正月乙卯大赦改元戊辰大將軍王敦舉兵於武昌以誅劉隗為名龍驤將軍沈充帥衆應之三月徵征西將軍戴若思鎮北將軍劉隗衛京都劉隗軍于金城右將軍周禮守石頭帝被甲徇六師於郊外遣平南將軍陶侃領江州安南將軍甘卓領荊州各帥所統以躡敦後夏四月敦前鋒攻石頭周禮開城應之奮威將軍侯禮死之敦據石頭

戴若思劉隗帥衆攻之王導周顗郭逸虞潭等三道出戰六軍敗績尚書令刁協奔于江乘為賊所害鎮北將軍劉隗奔于石勒帝遣使謂敦曰公若不忘本朝於此息兵則天下尚可安也如其不然朕當歸於琅琊以避賢路辛未大赦敦自為丞相都督中外諸軍錄尚書事封武昌郡公邑萬戶十一月己丑帝崩於內殿在位六年時年四十七葬平陵廟號中宗

孫盛晉陽秋曰昔秦始皇東遊望氣者云五百年後東

南金陵之地有天子氣於是始皇改曰秣陵吳人以為
孫權帝之表也盛按始皇遊歲至權僭號四百三十七
年考之年數既不合校之基守又非倫豈應帝王之符
而見兆於上代乎有晉金行奄君四海金陵之祥其在
斯乎且秦政東遊至是五百二十六年所謂五百年之
後當有王者也又孫皓將亡吳郡臨蕪湖一夜草木自
除於湖邊得石函中有小石青白色長四尺廣二寸餘
上有白帝字時人莫察其祥意者其中宗興五湖之徵

歟太康三年建業有寇餘姚人任振以周易筮之曰寇
已滅矣後三十八年揚州當有天子又太安中童謠曰
五馬浮渡江一馬化為龍永嘉大亂王室淪覆唯琅瑯
西陽汝南南頓彭城五王獲濟至是中宗登祚先是歲
鎮熒惑太白四聚於牛斗之間五鐸又見于晉陵冥數
元感若合符契焉又初元石圖有牛繼馬後故宣帝深
忌牛氏遂為二榼共一口以貯酒帝先飲佳者以毒者
酖其將牛金而恭王妃夏氏通小吏牛金而生元帝亦

有符云

世說曰元帝始過江謂顧驃騎曰寄人國事志常懷慙
榮跪答曰臣聞王者天下為家是以秋毫無定處九鼎
後洛邑願陛下無遷為念

又曰元帝正會引丞相王道登御牀王公既固辭中
宗引之彌苦文獻曰使太陽與萬物同暉臣下何以
仰瞻

明皇帝

晉書曰明皇帝諱紹字道畿元皇帝長子也幼而聰哲
為元帝所寵異年數歲嘗坐置膝前屬長安使來因問
帝曰汝謂日與長安孰遠近對曰長安近不聞人從日
邊來居然可知也元帝異之明日宴羣寮又問之對曰
日近元帝失色曰何乃異間者言之對曰舉目見日不
見長安由是益竒之建興初拜東平中郎將鎮廣陵元
帝為晉王及即帝位為皇太子性至孝有文武才畧永
昌元年閏月己丑元帝崩庚寅太子即皇帝位太赦尊

所生荀氏為建安郡君大寧元年三月戊寅朔改元臨軒
停饗宴之禮縣而不樂二年夏五月王敦矯詔拜其子
應為武衛將軍兄含為驃騎大將軍帝所親信常從督
公秉雄冉曾並為敦所害六月敦將舉兵內向帝密知
之乃乘巴滇駿馬微行至於湖陰察敦營壘而出軍士
疑帝非常人又敦晝寢夢日環其城驚起曰此必黃鬚
鮮卑奴來也帝母荀氏燕代人帝狀類外氏鬚黃敦故
謂帝云於是使五騎物色追帝帝亦馳去僅以獲免秋

七月壬申朔敦遣其兄含及錢鳳周撫鄧岳等水陸五萬至於南岸令溫嶠移屯水北燒朱爵桁以挫其鋒帝躬帥六軍出次南皇堂至癸酉夜募壯士遣將軍段秀中軍司馬曹渾左衛參軍陳嵩鍾寅等甲卒千人渡水掩其未備平旦戰於越城大破之斬其前鋒將何康王敦憤惋而死三年春正月戊戌復三族刑唯不及婦人三月戊辰立太子衍為皇太子大赦增文武位二等大酺三日賜鰥寡孤獨帛人二疋閏八月壬午帝不豫召

太宰西陽王羨司徒王導尚書令卞壺車騎將軍郗鑒
護軍將軍庾亮領軍將軍陸曄丹陽尹溫嶠並受遺詔
輔太子戊子帝崩於東堂在位三年時年二十七葬武
平陵廟號肅祖

晉陽秋曰明帝文武鑒斷初在東宮敬禮賢士昵近明
德自王導庾亮溫嶠桓彝阮放皆見親侍分好綢繆雅
好辭章談論辯明理義與二三君子並著詩論粲然可
觀于時東宮號為多士王敦既平思求民莫詔尚書令

僕射尚書曰吾飢於餐直言渴於求亮正想諸君達此懷矣予違汝弼堯舜之相君臣吾雖虛闇度不距逆耳之談稷契之任諸君居之矣望共勗之

世說曰晉明帝欲起池臺元帝不許之明帝為太子好養武士夕中作池比曉便成即今謂太子池是

成皇帝

晉書曰成皇帝諱衍字世根明帝長子也大寧三年三月戊辰立為皇太子閏月戊子明帝崩己丑太子即帝

位大赦增文武位二等賜鰥寡孤老帛人二疋尊皇后
庾氏為皇太后秋七月癸卯皇太后臨朝稱制咸和元
年春二月丁亥大赦改元大酺五日賜鰥寡孤老米人
二斛二年十一月豫州刺史祖約厯陽太守蘇峻等反
十二月辛亥蘇峻使其將韓晃入姑孰屠蕪湖三年二
月庚戌峻至于蔣山假領軍將軍卞壺節六軍及峻戰於
西陵王師敗績丙辰峻攻青溪柵因風縱火王師又大
敗尚書令領軍將軍卞壺丹陽尹羊曼黃門侍郎周導

廬江太守陶瞻並遇害死者數千人庾亮又敗于宣陽門內遂攜其諸弟與郭默趙裔奔尋陽於是司徒王導右光祿大夫陸曠荀崧等衛帝於太極殿太常孔愉守宗廟賊乘勝麾戈接於帝座突入太后後宮左右侍人皆見掠奪是時大官惟有燒餘米數石以供帝膳百姓號泣震響都邑丁巳峻矯詔大赦又以祖約為侍中太尉尚書令自為驃騎將軍錄尚書事五月乙未峻逼天子於石頭帝哀泣升車宮中慟哭峻以倉屋為宮九月

戊申司徒王導奔於石庚午陶侃使督護楊謙攻於石頭溫嶠庾亮陣於石頭竟陵太守李陽拒賊南偏峻輕騎出戰墜馬斬之衆遂大潰賊黨復立峻弟逸為帥四年二月內大雨霖丙戌諸軍攻石頭李陽與蘇逸戰於祖浦陽軍敗建威長史滕含以銳卒擊之逸等大敗含奉帝御于溫嶠舟羣臣頓首號泣請罪丁亥大赦時兵火之後宮闕灰燼以建平園為宮甲午蘇逸以萬餘人自延陵湖將入吳興乙未將軍王允之及逸戰於溧

陽獲之咸康元年春正月庚午朔帝加元服大赦改元
增文武位一等大酺三日賜鰥寡孤獨不能自存者米
人五斛二月揚州諸郡饑遣使賑濟八年夏六月庚申
帝不豫詔曰朕以眇年獲嗣洪緒位於羣公之上於茲
十有八年未能闡融政道翦除逋寇夙夜戰兢匪遑寧
處今遘疾殆不興是用震悼於厥心年齡眇眇未堪艱
難司徒琅瑯王岳親則母弟體則仁長君人之風允塞
時望肆爾羣公卿士其輔之以祇奉祖宗明祀協和內

外允執其中嗚呼敬之哉無墜祖宗之顯命壬辰引武
陵王晞會稽王昱中書監庾冰中書令何充尚書令諸
葛恢並受顧命癸巳帝崩於西堂在位十七年時年二
十二葬興平陵廟號顯宗

太平御覽卷九十八

欽定四庫全書

太平御覽卷九十九

宋 李昉等 撰

皇王部二十四

東晉康皇帝

穆皇帝

哀皇帝

廢帝海西公

簡文皇帝

孝武皇帝

康皇帝

晉書曰康皇帝諱岳字世同成帝母弟咸和元年封吳王二年徙封琅琊王九年拜散騎常侍加驃騎將軍咸和五年遷侍郎司徒八年六月庚寅成帝不豫詔以琅琊王為嗣癸巳成帝崩甲午即皇帝位大赦巳亥封成帝子丕為琅琊王奕為東海王時帝諒陰不言委政於庾冰何充十二月壬子立皇后褚氏建元元年春正月改元賑恤鰥寡孤獨三月以中書監庾冰為車騎將軍二年九月丙申立皇子聃為皇太子戊戌帝崩於式乾

殿在位三年時年二十三葬崇平陵初成帝有疾中書令庾冰自以舅氏當朝權傾人主恐異世之後戚屬將疎乃言國有強敵宜立長君遂以帝為嗣制度年號再興中朝因改元曰建元或謂冰曰郭璞識云立始之際丘山傾立者建也始者元也丘山諱也冰瞿然既而歎曰如有吉凶豈改易所能救乎至是果驗云

世說曰何次道庾季堅二人並為元輔成帝初崩於時嗣君未定何欲立嗣子庾及朝議以外寇方強嗣子沖幼乃立

康帝康帝既登阼會羣臣謂何曰朕今所以承大統為誰之議何曰陛下龍飛臣冰之功使於時用微臣議今不覩聖明之世上有慙色

穆皇帝

晉書曰穆皇帝諱昞字彭祖康帝子也建元二年九月庚申立為皇太子戊戌康帝崩己亥即皇帝位時年二歲大赦尊皇后為皇太后壬寅皇太后臨朝攝政永和元年春正月甲戌朔皇太后設白紗帷于太極殿抱帝

臨軒改元二年十一月辛未安西將軍桓溫帥虜將軍
周撫輔國將軍譙王無忌建武將軍袁喬伐蜀拜表軌
行十二月枉矢自東南流于西北其長半天三年春三月
桓溫攻成都克之李勢降益州平十年二月己丑大赦
征西將軍桓溫帥師伐關中廢揚州刺史殷浩為庶人
六月苻堅將苻雄悉衆及桓溫戰於白鹿原王師敗
績九月辛酉桓溫以糧盡遂還升平元年春正月壬戌
朔帝加元服告于太廟始親萬幾大赦改元增文武位

一等皇太后居崇德宮五年五月丁巳帝崩顯陽殿在位十七年時年十九葬永平陵廟號孝宗

哀皇帝

晉書曰哀皇帝諱丕字千齡成帝長子也咸康八年封為琅琊王永和九年拜散騎常侍十二年加中軍將軍升平三年除驃騎將軍五月丁巳穆皇帝崩皇太后令曰帝奄不救疾嫡嗣未建琅琊王丕本中興正統明德懋親昔在咸康屬當儲貳以年在幼沖未堪國難故顯

宗高讓今議望情地莫與為比其以王奉大統於是百官備法駕迎于琅琊第庚申即皇帝位大赦八月己卯夜天裂廣數丈有聲如雷九月戊申立皇后王氏穆帝皇后何氏稱永安宮興寧元年九月壬戌大司馬桓溫帥衆北伐癸亥以皇子生大赦二年二月癸卯帝親耕籍田三月庚戌朔大閱人戶嚴法禁辛亥不豫帝雅好黃老斷穀餌長生藥服食過多遂中毒不識萬幾崇德太后復臨朝攝政三年二月庚申帝崩于西堂在位四

年時年二十五葬安平陵

廢帝海西公

晉書曰廢帝諱奕字延齡哀帝母弟也咸康八年封為東海王永和八年拜散騎常侍尋加鎮軍將軍升平四年拜車騎將軍五年改封琅琊王隆和初轉侍中驃騎大將軍開府儀同三司興寧三年二月庚申哀帝崩無嗣丁酉皇太后詔曰帝遂不救厥疾艱禍仍臻遺緒泯然哀慟切心琅琊王奕明德懋親屬當儲副宜奉祖宗

纂承大統便速正大禮以寧人神于是百官奉迎于琅
琊王第是日即皇帝位大赦太和四年夏四月庚戌大
司馬桓溫率衆伐慕容暉七月辛卯暉將慕容垂帥衆
拒溫溫敗之九月戊寅桓溫裨將鄧遐朱序遇暉將傅
末波于林渚又大破之戊子桓溫至枋頭丙申以糧運不
繼焚舟而歸六年冬十一月癸卯桓溫自廣陵屯于白
石丁未詣闕因圖廢立誣帝在藩夙有痿疾嬖人相龍
計好朱靈寶等參侍內寢而二美人田氏孟氏生三男

長欲封樹時人惑之溫因諷太后以伊霍之舉已酉集
百官于朝堂宣崇德太后令曰王室艱難穆哀短祚國
嗣不育儲宮靡立琅琊王奕親則母弟故以入纂大位
不圖德之不建乃至斯昏濁潰亂動違禮度有此三
孽莫知誰子人倫道喪醜聲遐布既不可以奉守社稷
敬承宗廟且昏孽並大便欲建樹儲藩誣罔祖宗傾移
皇基是而可忍孰不可忍今廢奕為東海王以王還第
供衛之儀皆如漢朝昌邑故事初桓溫有不臣之志欲

先立功河朔以收時望及枋頭之敗威名頓挫遂潛謀廢立以長威權然憚帝守道恐招時議以宮闈重閤牀第易誣乃言帝為閹遂行廢辱初帝平生每以為慮嘗召術人扈謙筮之卦成答曰晉室有盤石之固陛下有出宮之象竟如其言咸安二年正月降封帝為海西縣公

臧榮緒晉書曰太和元年桓溫表率方伯北伐秋九月溫以王師敗績于枋頭溫自廣陵屯于白石集百官于

朝堂稱崇德太后詔廢帝為東海王妖賊盧悚遣弟子
殿中監許龍晨到門稱太后密詔奉迎興復帝曰我得罪到此
幸蒙寬宥豈敢妄動且太后有詔便應官屬來迎何得
如此必狂亂因叱左右縛之龍晨懼而走由是朝廷以帝
安于屈辱無僥倖之望不得懷疑帝亦知天命不再而
深慮人禍乃蔽聽塞明無思慮終日酣飲耽于內寵有
子不養庶保天年吳民憐之為作歌謠帝崩于吳宮年
四十五因葬吳地

續晉陽秋曰帝少同閹人之疾而暱比左右初在東海
琅琊因親近嬖人相龍計好朱靈寶等並侍卧內美人
田氏遂生三男衆致疑惑然莫能審其虛實至是將建
儲貳大司馬桓溫因之以定廢立之計遂率百僚並還
朝堂本省溫平旦以衆入分兵屯宮門呈草于皇太后
后曰今廢奕為東海王還第供衛之儀如漢朝昌邑故
事丞相錄尚書事會稽王昱體自中宗明德劭令民望
依係為日已久宜應天人以統皇極主者明依舊典以

時施行但未亡人不幸罹此百憂感念存歿心焉如割
社稷大計義不獲已臨紙悲塞如何可言時太后在佛
屋燒香內侍啓云外有急奏太后乃出堂倚戶前視表
數行乃曰我本自疑此至半便止求筆題奏後云未亡
人惟此百憂感念存歿心焉如割溫奏未有此十五字
遂即奏迴換內之

簡文皇帝

晉中興書曰太宗簡文帝諱昱字道成中宗少子也母

曰鄭夫人永興二年封琅琊王咸和元年鄭夫人薨上時年七歲號慕泣血乞得服重朝議哀之故從封會稽王康獻皇后臨朝建位撫軍大將軍錄尚書六條事二年驃騎將軍何充薨皇太后詔上內總萬幾海西公即位七月以琅琊王封絕復徙上為琅琊王封王子昌明為會稽王固讓不受太和元年十月詔以為丞相尚書入朝不趨讚拜不名劔履上殿給羽葆鼓吹班劔六十人固讓不受海西公廢於是大司馬溫率百官進太極

前殿具乘輿法駕奉迎於朝堂變服著平巾幘單衣東
向拜受璽流涕即位改太和六年為咸安元年乙卯廢
太宰武陵王為庶人二年七月上不豫己未立會稽王
昌明為皇太子封王子道子為琅琊王領會稽內史是
日帝崩于東堂在位一年時年五十二

續晉陽秋曰桓溫始以雄武入輔繼以廢立帝雖登祚
內不自安初熒惑入太微尋廢海西公至是熒惑猶在
太微帝惡之因謂郗超曰命之修短本欲不計故當無

復往日事耶超云大司馬臣溫方內固社稷外布經畧
非常之事臣以百口保之超還東帝謂之曰致意尊公
家國之事遂至於此由吾不能以道自衛思患預防愧
歎之深言何能喻又誦庾闡詩云志士痛朝危忠臣哀主辱
因泣下及不豫詔溫曰吾遂委頓足下便不冀得相見
又詔曰不謂疾患遂至於此今者愀然勢不復久旦雖
有詔豈復相及慨恨兼深如何可言天下艱難而昌明
幼沖眇然非阿衡輔道之計當何以寧濟社稷國事家

計一託之於公

又曰帝以太興三年生弱而慧異中宗深器焉及長美丰姿好清言舉止端詳器服簡素與劉恢王蒙等為布衣之友由登庸厯位散騎常侍右將軍撫軍將軍以懿親民望任登宰輔值穆帝幼沖母后臨朝桓溫有平蜀洛之勲擅強西陵帝於家國之計具瞻所歸而自斷之弱無以抗之陳郡人殷浩素有盛名時論比之管葛又琅邪王洽丞相道子既是名公子少有聲望乃以浩為

湘州刺史洽為長史徐州刺史葛美亦以清貴名藩同心憂國溫見此樹置知在抗已溫既以雄武專朝任兼將相悉衆北討以成樂推之勢及枋頭奔敗知民望之去乃屠豫州刺史袁真于壽陽城既而郗超曰足下何以雪枋頭之恥乎超因說溫以廢立之事溫既宿有此謀深納超言既廢昏立明民人悅服然恭已南面政自溫出帝性韻深沈雅有局鎮嘗與太宰武陵王晞桓溫同乘至板橋溫密勅令無因而鳴角鼓譟部伍並皆驚

馳溫佯為駭異而晞大震驚急求下車帝舉止自若顏色不變溫每以此稱其德量故論者服憚之深若假帝修年則溫篡逆之圖絕矣

世說曰桓公既廢太宰武陵王晞父子仍上表云應割近情以存遠計欲除太宰父子可無後憂簡文手答表云所不忍言況過于言桓公得此答又重有表辭轉苦切為家國之計必應行事簡文復手答云若使晉室靈長明公便應奉詔書若大運去矣請避賢路桓公讀詔

手戰汗流而止遠徙新安而已

孝武皇帝

晉書曰孝武皇帝諱曜字昌明簡文帝第三子也興寧二年七月甲申封會稽王咸安二年秋七月己未立為皇太子是日簡文帝崩太子即皇帝位詔曰朕以不造奄丁憫凶號天扣地靡知所訴藐然幼沖眇若綴旒深惟社稷之重大懼不克負荷仰憑祖宗之靈積德之祀先帝淳風玄德遺咏在民宰輔英賢勲隆德盛顧命之

託實賴匡訓羣后率職百僚勤政冀孤弱之躬有寄皇
極之基不墜先恩遺惠播於四海思弘餘潤以康黎庶
其大赦天下與民更始九月甲寅追尊皇妣會稽王妃
曰順皇后冬十一月甲午妖賊盧悚晨入殿庭遊擊將
軍毛安之討擒之是歲三吳大旱人多餓死詔所在賑
給寧康元年春正月乙丑改元二月大司馬桓溫來朝
秋七月己亥使持節侍中都督中外諸軍事丞相錄尚
書大司馬揚州牧平北將軍徐兗二州刺史南郡公桓

溫薨三年九月帝講孝經冬十月癸酉日有食之十二月甲申神獸門災癸未皇太后詔曰頃者日食告變水旱適遭雖克已思救未盡其方賜百姓窮者米各五斛癸巳帝釋奠于中室祀孔子以顏回配泰元元年春正月帝加元服見于太廟皇太后歸政甲辰大赦改元庚午帝始臨朝六年春正月帝初奉佛法立精舍于殿內引諸沙門以居之八年八月苻堅率衆渡淮遣征討都督謝石冠軍將軍謝玄輔國將軍謝琰中郎將桓伊等

拒之九月詔司徒琅瑯王道子錄尚書六條事冬十月
苻堅弟苻雄陷壽春乙亥諸將及苻堅戰于淝水大破
之俘斬數萬計獲堅輿輦及雲母車十二年六月癸卯
東帛聘處士戴逵龔玄之秋八月辛巳立皇子德宗為
皇太子大赦二十一年九月庚申帝崩于清暑殿在位
二十四年時年三十五葬平陵帝幼稱聰悟簡文之崩
也時年十歲至晡不臨左右進諫答曰哀至則哭何常
之有謝安嘗嘆以為精理不減先帝既威權已出雅有

人主之量既而溺於酒色殆為長夜之飲末年長星見
帝心甚惡之夜於華林園舉酒祝之曰長星勸汝一杯
酒自古何有萬歲天子耶太白連年晝見地震水旱為
變者相屬醒日既少而傍無正人竟不能改焉時張貴
人有寵年三十帝戲之曰汝以年當廢矣貴人潛怒向
夕帝醉遂暴崩時道子昏惑元顯專權竟不推其罪人
初簡文帝見讖云晉祚盡昌明及帝之在孕也李太后
夢神人謂之曰汝生男以昌明為字及產東方始明因

以名焉簡文帝後悟乃流涕及為清暑殿識者以為清暑反為楚聲哀楚之徵也俄而帝崩晉祚自此傾矣

續晉陽秋曰初帝耽於色末年殆為長夜之飲醒日既少多居內殿畱連于聲色之間時張貴人寵冠後宮威行閭內年幾三十帝妙列伎樂陪侍嬪少乃笑而戲之云汝年當廢矣吾已屬諸姝少矣貴人潛怒上不覺上稍醉卧貴人遂令其婢蒙之以被既絕云以魘崩至丑時方遷登太極前殿

異苑曰晉孝武太元末帝每聞手巾箱中有鼓吹鞀角之音于是請僧齋會夜見一臂長三丈許手長數尺來摸經案晉祚自此而衰

太平御覽卷九十九

欽定四庫全書

太平御覽卷一百

宋 李昉等撰

皇王部二十五

東晉安皇帝

桓玄

附

恭皇帝

安皇帝

晉書曰安皇帝諱德宗孝武帝長子也太元十二年八

月辛巳立為皇太子二十一年九月庚申孝武崩辛酉
太子即位太赦癸亥以司徒會稽王道子為太傅攝政
隆安元年春正月己亥朔帝加元服改元增文武位一
等太傅會稽王道子歸政四月甲戌兖州刺史王恭豫
州刺史庾楷舉兵以討尚書左僕射王國寶建威將軍
王緒為名甲申殺國寶及緒以說于恭恭乃罷兵二年
七月兖州刺史王恭豫州刺史庾楷荊州刺史殷仲堪
廣州刺史桓玄南蠻校尉楊佺期等舉兵反八月江州

刺史王愉奔于臨川九月辛卯加太傅會稽王道子黃
鉞遣征虜將軍會稽王元顯等討桓玄輔國將軍劉牢
之次新亭使子敬宣擊敗恭恭奔曲阿長塘湖尉收送
京師斬之尋遣太常殷茂諭仲堪追玄玄等走于尋陽
三年十一月甲寅妖賊孫恩陷會稽內史王凝之死之
吳國內史桓謙等並委官而遁遣衛將軍謝琰等逆擊
走之四年五月孫恩寇浹口庚寅謝琰為孫恩所陷死
之恩轉寇臨海六月輔國司馬劉裕破恩於南山恩將

盧循陷廣陵元興元年正月庚午朔大赦改元以後將軍元顯為驃騎將軍征討大都督鎮北將軍劉牢之為元顯前鋒將軍譙王尚之為後部以討桓玄二月庚午帝戎服餞元顯于西池丁巳遣兼侍中齊王柔之以駟虞幡宣告荆江二州丁卯桓玄敗王師于姑熟三月壬申桓玄自為侍中丞相錄尚書事二年春正月辛丑建威將軍劉裕破徐道復于東陽乙卯桓玄自稱大將軍丁巳冀州刺史孫無終為桓玄所害秋八月玄又自號

相國楚王九月南陽太守庾仄起義兵為玄所敗冬十一月壬午玄遷帝于永安宮癸未移太廟神主于琅瑯國十二月壬辰玄篡位以帝為平國王辛亥帝蒙塵于尋陽三年春二月帝在尋陽庚寅夜濤水入石頭漂殺人戶乙卯建武將軍劉裕帥沛國劉毅東海何無忌舉義兵庚辰斬桓玄所署徐州刺史桓修于京口及青州刺史桓弘于廣陵丁巳義師濟江三月戊午劉裕斬玄將吳甫之于江東斬皇甫敷于羅落己未桓玄衆潰而

逃庚申劉裕置留臺具百官壬戌玄司徒王謐推劉裕
行鎮軍將軍徐州刺史都督揚徐兗豫青冀幽并八州
諸軍事假節劉裕以謐領揚州刺史錄尚書事辛酉劉
裕誅尚書左僕射王愉及愉子荊州刺史子緩司州刺
史溫詳辛未桓玄逼帝西上庚戌密詔以幽逼于玄萬
幾虛曠令武陵王遵依舊典承制總百官行事加侍中
餘如故并大赦謀反大逆已下唯桓溫一祖之後不宥
夏四月己丑大將軍武陵王遵稱制總萬幾庚寅帝至

江陵庾戌輔國將軍何無忌振武將軍劉道規及桓玄
將庾稚何澹之戰于湓口大破之玄復逼帝東下五月
癸酉冠軍將軍劉毅及玄戰于崢嶸洲又破之己卯帝
復幸江陵辛巳荊州別駕王康崖南郡太守王騰之奉
帝居于南郡壬午督護馮遷斬桓玄于南谿州乘輿反
正于江陵閏月己丑桓玄揚武將軍桓振陷江陵帝復
蒙塵于賊營義熙元年正月帝在江陵南陽太守魯宗
之起義兵襲破襄陽己丑劉毅次于馬頭桓振以帝屯

于江津辛卯宗之破振將溫楷于祚溪進次紀南為振所敗振武將軍劉道規擊桓謙走之乘輿反正帝與琅瑯王幸道規舟二月丁巳留臺備乘輿法駕迎帝于江陵三月桓振復襲江陵荊州刺史司馬休之奔于襄陽建威將軍劉懷肅討振斬之帝至自江陵六年十二月壬辰劉裕破盧循于豫章七年春二月壬午右將軍劉藩斬徐道復于始興傳首京師夏四月盧循走交州刺史杜惠斬之十二年八月劉裕及琅瑯王德文率衆伐

姚泓庚午大赦冬十月庚寅姚泓將姚光以洛陽降已丑遣兼司空高密王恢之修謁武陵十三年秋七月劉裕克長安執姚泓收其彝器歸京師十四年十二月戊寅帝崩于東堂在位二十三年時年四十七葬休平陵帝不慧自少及長口不能言雖寒暑之變無以辨也凡所動止皆非已出故桓玄之篡因此獲全

桓玄

晉書曰桓玄字敬道一名靈寶大司馬溫之孽子也其

母馬氏嘗與同輩月下夜坐見流星墜銅盆中忽為二珠燦然明淨競以瓢接取馬氏得而吞之若有感遂有光照室占者奇之故小名曰靈寶妳媪每抱詣溫輒易人而後至其重兼常兒溫甚愛異之臨終命以為嗣襲爵年七歲溫服終府州文武辭其叔父沖沖撫玄頭曰此汝家故吏也玄因涕泣被面衆並異之及長形貌瑰奇丰神疎朗博綜藝術善屬文常負其才地以雄豪自處時咸憚之年二十三拜為太子洗馬時議謂溫有不

臣之迹故折玄兄弟而為素官後出補義興太守鬱鬱
不得志嘗登高望震澤歎曰父為九州伯兒為五湖長
棄官歸國自以元勲之門而負謗于世乃上疏曰臣聞
周公大聖而四國流言樂毅王佐而被謗騎劫荅伯有
豺獸之慨蘇公興飄風之刺惡直醜正何代無之先臣
蒙國殊遇姻婭皇極西平巴蜀北清伊洛竊號之冠繫
頸北闕園陵復修大恥再雪飲馬瀚澹懸旌趙魏勤王
之師功非一捷太和末皇基有潛移之懼遂奉天順人

翼登聖朝晉室之基危于殷漢先臣之功高于伊霍矣
至於先帝龍飛九五陛下之所以繼明南面請問談者
誰之由也若陛下忘先臣大造之功信貝錦萋斐之說
臣等自當奉還三封受戮市朝然後下從先臣歸先帝
玄宮耳疏寢不報玄在荆楚積年優游無事荊州刺史
殷仲堪敬憚之及中書令王國寶用事謀削弱方鎮內
外騷動知王恭有憂國之言玄潛有意於功業乃說仲
堪宜興晉陽之師以內匡朝廷已當悉荆楚之衆順流

而下推王恭為盟主此桓文之舉也俄而王恭信至招仲堪及玄匡正朝廷國寶既死于是罷兵詔以玄為廣州刺史其年王恭又與庾楷起兵討江州刺史王愉及譙王尚之兄弟玄仲堪謂恭事必克捷一時響應仲堪令玄與楊佺期為前鋒玄至湓口獲王愉詔以玄為江州各西還屯于尋陽共相結納推玄為盟主後荊州大水仲堪賑恤飢者倉廩空竭玄乘其虛而伐之至江陵仲堪數道拒之不克佺期自襄陽來救期敗走殷仲堪

亦見害于是平荆雍詔以玄督八州荊州牧玄于是樹腹心兵馬日盛其後孫恩逼京師玄建牙旗聚衆外託勤王實欲觀釁以兄偉為冠軍江州刺史畱偉守江陵抗表率衆下至尋陽移檄京師罪狀元顯玄既興師犯順慮衆不為用恒有迴旆之計既過尋陽不見王師意甚悅將吏亦振先使其將馮該等攻譙王尚之敗之劉牢之遣子敬宣降玄至新亭元顯自潰玄入京師矯詔加已總百揆為丞相黃鉞羽葆鼓吹府置官屬乃徙太

傳道子于安成害元顯于市多修朝望改易百官各置
所親大赦改元為大亨玄將出居姑孰其中書令王謐
對曰公羊有言周公何以不之魯欲天下一乎周也願
靜根本以公旦為心玄善其對而不從遂大築城府乃
出鎮馬大政皆咨之小事則決于僕射桓謙及卞範之
後諷朝廷封諸子弟為公自知怨滿天下欲速定篡逆
殷仲文卞範之等又共催促之于是先改授郡司其黨
皆三公又矯詔封十郡為楚王加九錫備物楚國置丞

相以下一遵舊典又諷天子御前殿而策授焉玄屢偽讓
詔遣百僚敦勸乃就命玄偽上表求歸藩又自作詔畱
之遣使宣旨玄又上表固請又諷天子作詔固畱十一
月矯制加具備天子禮服僭御禮樂焉又矯詔使王謐
兼太保奉帝璽禪位于已帝出居永安宮移晉神主于
琅瑯廟初玄恐帝不為手詔又慮璽不可得逼臨川王
寶請帝自為手詔因奪取璽比臨軒璽已久出玄甚喜
百官到姑孰玄偽讓朝臣固請乃于城南七里玄立郊

壇以玄牡告天百僚陪列而儀注不備忘稱萬歲遂升
壇燎于南郊大赦改元永始初偽詔改元為建始右丞
王攸之曰永始復是王莽始執權之歲也其兆號不祥
冥符僭逆如此國號大楚以南康平固縣奉晉帝為平
固王車旗正朔如舊典遷居尋陽依陳畱王處鄴宮故
事追尊其父溫宣武皇帝諸子皆為王玄入建康宮逆
風迅雷激其儀飾皆傾及小會西堂設鼓樂殿上施絳
帳鏤黃金為顏四角作金龍頭銜五色羽葆流蘇羣臣

私相謂曰此頗似轎車亦王莽仙蓋之流也玄以其妻
劉氏為皇后更造大輦容三十人坐以二百人舁之性
好畋遊以體大不堪乘馬又作徘徊輿施轉開合動作
無滯玄自篡盜之後驕奢荒侈遊畋無度以夜繼晝性
又急暴呼召嚴速直官咸繫馬省前禁內雜亂無復朝
廷之體于是百姓疲苦朝野勞悴怨怒思亂者十室八
九馬劉裕劉毅何無忌等共謀克復裕等斬桓修于京
口斬弘于廣陵裕率義軍至竹里玄遣吳甫之皇甫敷

北拒義軍裕等於江乘與戰臨陣斬數及甫之玄聞之大懼乃召諸道術人推算數為厭勝之法乃問衆曰朕其敗乎曹靖之對曰神怒人怨臣實懼焉玄曰人或可怨神何怒對曰移晉宗廟飄泊無所大楚之祭不及于祖此其所以怒也玄曰卿何不諫對曰輦上君子自以為堯舜之世何敢妄言玄愈忿懼使桓謙何澹之屯東陵卞範之屯覆舟山帥衆二萬拒義軍裕至蔣山使老弱登山分張旗幟數道並前玄懼候還云裕軍四塞不

知多少玄益憂惶于時東北風急義兵放火烟塵漲天
鼓噪之音震駭京邑劉裕執鉞麾而進謙等諸軍一時
奔潰玄率親信數千人聲言赴戰遂出南掖門西至石
頭使殷仲文具舟相與南奔或勸其戰玄不暇荅直以策
指天而經日不得食左右進以粗飯咽不能下其子昇
時年數歲抱玄冑而撫之玄悲不自勝劉裕以武陵王
導攝萬幾立行臺總百官遣劉道規躡玄玄至尋陽江
州刺史郭昶之給其器用殷仲文自後至望見玄舟旌

旗輿服備帝者之儀嘆息曰敗中復振故可也玄于是逼乘輿西上于道作起居注叙其拒義軍之事自謂經畧指授算無遺策諸將違節度以致虧喪非戰之罪玄至江陵石康納之未三旬衆盛謂其羣黨曰卿等並清塗翼從朕躬都下竊位者方應謝罪軍門其觀卿等入石頭並雲霄中人也玄遣何澹之守湓口何無忌劉道規等破之帥舟艦三百發江陵以徐放為常侍遣說無忌等解軍謂放曰諸人不識天命致此妄作遂懼禍屯

結卿三州所信可明示朕心若退軍解甲當與之更始
授任江水在此朕不食言時道規已至玄與戰於崢嶸
洲於時義兵數千玄兵甚盛而玄懼有敗常漾輕舸於
舫側故其衆莫有鬪心義軍乘風縱火盡銳爭先玄衆
大潰玄畱永安太后及皇后于巴陵殷仲文時在玄艦
求出別船收集散軍因叛玄奉二后奔於江陵玄欲出
漢州投梁州刺史桓希而制令不行玄乘馬出城至門
左右於閭中所之不中前後相殺交橫玄僅免于荆

州別駕王康產奉帝入南郡時益州刺史毛璩使其從
孫祐之送弟璠喪葬江陵有衆二百璩弟子修之先為
玄校尉誘玄以入蜀達枚回洲祐之迎擊玄矢下如雨
玄被箭其子昇拔去之益州督護馮遷抽刀而前玄拔
頭上玉簪與之仍曰是何人耶敢殺天子遷曰欲殺天
子之賊耳遂斬首時年三十六自篡逆至敗時凡八旬
矣

恭皇帝

晉書曰恭帝諱德文安帝母弟也初封琅琊王歷中軍將軍散騎常侍衛將軍開府儀同三司侍中領司徒錄尚書六條事元興初遷車騎大將軍桓玄執政進位太宰加袞冕之服綵紱綬玄篡位以帝為石陽縣公與安帝俱居尋陽及玄敗隨至江陵玄死桓振奄至躍馬奮戈直至塔下噴目謂安帝曰臣門戶何負國家而屠滅若是帝乃下牀謂振曰此豈我兄弟意耶振乃下馬致拜振平復為琅琊王又領徐州刺史尋拜大司馬領司徒加

殊禮義熙五年置左右司馬長史從事中郎四人加羽
葆鼓吹十二月戊寅安帝崩是日即帝位大赦元熙元
年春正月壬辰朔改元以山陵未厝不朝會立后褚氏
甲午徵劉裕還朝二年夏六月壬戌劉裕至于京師傅
亮承裕密旨諷帝禪位草詔請帝書之帝欣然謂左右
曰桓玄之時天命已去為劉公所延二十年矣今復何
恨乃書赤紙為詔甲子遂遜于琅瑯第劉裕以帝為零
陵王居于秣陵行晉正朔車旗服色一如其舊有其文

而不備其禮宋永初二年九月崩于內房時年三十六
謚恭皇帝葬沖平陵

續晉陽秋曰初安皇不慧起居動止不自已出帝每侍
左右雖涼溫飢飽之中而恭謹備焉時人稱其順弟又
雅信佛鑄見貨十萬造丈六金像于瓦官寺擇日齋戒
迎像竟步從十許里安皇帝歸陵有詔當出送八座奏
諫以為宜加珍攝乃止

沈約宋書曰褚秀之妹為恭帝后兄弟並盡忠孝高祖

知恭帝生男輒令方便殺焉或誘賂內人或密加毒害前後如此非一恭帝居秣陵宮帝懼見禍與褚后共止一室慮人鴆毒自食于床前高祖將殺之不欲遣人內入褚淡之兄弟褚后出別宮相見兵人乃踰垣而入進藥於恭帝恭帝不肯飲曰佛教自殺者不得復人身乃以被掩殺之

中興書曰昔中宗以丁丑之歲始稱晉王改築宗廟使郭璞筮之云載祀二百及今禪代庚申之歲凡百有二

年而天祿永終璞精於術數理無垂貳抑以百二期促故倒其辭為二百耶

史臣曰安帝即位之辰鍾無妄之日道子元顯並傾朝政主昏臣亂未有不亡者也雖有手握戎麾心存舊國回首無良忽焉消散于是桓玄承釁勢踰颺指六師咸泯隻馬徂遷是以宋高非典午之臣孫恩豈金行之寇若乃世遇顛覆則恭皇斯甚於越之民詎燠丹穴會稽之侶寧嘆入臣去黃屋而歸來灑丹書而不恨夫五運

攸革三微數盡猶高秋凋候理之自然觀其零落人有
為之流連者也

太平御覽卷一百

欽定四庫全書

太平御覽卷一百一

宋 李昉等 撰

皇王部二十六

後魏諸帝

太祖道武皇帝

後魏諸帝

後魏書序記曰黃帝有子二十五人或內列諸華或外
分荒服昌意少子受封北國有大鮮卑山因以為號其



後世為君長統幽都之北廣漠之野畜牧遷徙射獵為業淳樸為俗簡易為化不為文字刻木契而紀世事遠近人相傳授如史官之紀錄焉黃帝以土德王北俗謂土為托謂后為跋故以為氏其裔始均入仕堯世逐女魃於弱水北民賴其勲帝堯嘉之命為田祖爰歷三代以及於秦薰鬻獫狁山戎匈奴之屬累代殘暴作害中州而始均之裔不交南夏是以載籍無聞焉積六十七世至成皇帝諱屯立聰武明智遠近所推統國三十六

大姓九十威振北方莫不率服成帝崩節皇帝諱貸立
節帝其後四世宣帝諱推寅立南遷大澤方千餘里厥
土冥昏沮洳謀更南徙未行而崩其後六世獻皇帝諱
鄰立時有神人言於國曰此土荒遐未足以建都邑宜
復徙居帝年時衰老乃以位授子武帝諱詰汾命南移
山谷高深九難八阻於是欲止有神獸其形似馬其聲
類牛先行導引歷年乃出始居匈奴之故地其遷徙策
畧多出宣獻二帝故時人並號曰推寅蓋俗云鑽研之

義初聖武帝常率數萬騎田於山澤歟見輜輶自天而下既至見美婦人侍衛甚盛帝異而問之對曰我天女也受命相偶遂同宿旦請還曰明年周時復會此處言終而別去如風雨及期帝至先所田處果復相見天女以所生男授帝曰此君之子也善視之子孫相承當世為帝王語訖而去即始祖神元皇帝也故時人諺曰詰汾皇帝無婦家力微皇帝無舅家帝崩始祖神元皇帝諱力微立生而英叡元年歲在庚子先是西部內侵國

民離散依於沒鹿回部大人賓賓始祖有雄傑之度時人莫測後與賓攻西部賓軍敗失馬步走始祖使人以所乘駿馬給之賓歸令其部內求與馬之人當加重賞始祖隱而不言賓後知大驚將分國之半以奉始祖始祖不受賓臨終戒其二子使謹奉始祖其子不從乃陰謀為逆始祖召殺之盡并其衆部大人悉皆款服控弦士馬二十餘萬三十九年遷於定襄之盛樂始祖乃告諸大人曰我歷觀前世匈奴踴頓之徒苟貪財利抄掠

邊民雖有所得而其死傷不足相補更招寇讎百姓塗炭非長計也於是與魏和親四十二年遣子文帝如魏且觀風土魏景元二年也文皇帝諱沙漠汗以國太子留洛為魏賓之冠魏晉禪代和好仍密始祖春秋已邁帝以父老求歸晉武帝具禮護送四十八年帝至自晉五十六年帝復如晉其年冬還國晉遺帝錦罽綵綿絹諸物咸豐厚車牛百乘行達并州晉征北將軍衛瓘以帝為人雄異恐為後患乃密啓晉帝請留不遣晉帝

難為失信不許瓘復請以金帛賂國之大人令致間隙
使相厄害晉帝從之於是國之執事及諸部大人皆受
瓘貨五十八年方遣帝始祖聞帝歸大悅使諸部大人
詣陰館迎之酒酣帝仰視飛鳥謂諸大人曰我為汝曹
取之授彈飛丸應弦而落時國俗無彈衆咸大驚並先
馳還始祖曰我子既歷他國進德何如皆對曰太子才
藝非常引空弓而落飛鳥似得晉人異法術亂國害民
之兆惟願察之自帝在晉之後諸子愛寵日進始祖年

踰期頤頗有所惑聞諸大人語意乃有疑因曰不可容者便當除之於是諸大人乃馳詣塞南害帝後乃追諡焉始祖尋崩凡饗國五十八年一百四歲太祖即位尊為始祖

章皇帝諱悉鹿立始祖之子也饗國九年而崩平皇諱綽立章之少弟也享國七年而崩思帝諱弗立文帝少子也即位一年崩昭皇帝諱祿官立始祖神元之子也九年分國為三部帝自以一部居東在上谷北濡源之

西東接宇文部以文帝長子桓皇帝諱猗也統之一部
居代郡之參合陂北以桓帝之弟穆皇帝諱猗盧統之
一部居定襄之盛樂故城自始祖以來與晉和好百姓
乂安財畜富實控弦騎士四十餘萬十年晉惠帝為成
都王穎逼畱在鄴匈奴別種劉淵反於離石號漢王并
州刺史司馬騰來乞師帝與桓帝同時大舉以助之大
破淵衆於西河上黨晉假桓帝大單于金印紫綬是歲
桓帝崩帝英傑魁岸馬不能勝常乘安車駕大牛角容

一石帝會中盡嘔吐之地仍生榆木參合陂土無榆樹
世人異之至今傳記十三年昭帝崩是歲羯胡石勒與
晉馬牧帥汲桑反穆皇帝天資英特勇畧過人昭帝崩
後遂總攝三部以為一統元年劉淵僭帝自稱大漢三
年并州刺史劉琨遣使以子為質又遣使乞師救洛陽
帝遣步騎二萬助之晉大傅東海王司馬越辭以洛中
饑饉師還是年劉淵死子聰僭立五年劉琨遣使乞師
以討劉聰石勒帝以琨忠義矜而許之會聰遣其子粲

襲晉陽害琨父母而據其城琨來告難帝大怒遣長子
六修桓帝子普根及衛雄范班姬澹等為前鋒帝統大
衆二十四萬為後繼衆懼棄輜重突圍遁走縱騎追之
斬其將劉儒劉豐伏尸數百里琨來拜謝帝以禮待之
琨固請進軍帝曰吾不早來致卿父母見害誠以後時
相愧今卿已復州境然吾遠來士馬疲弊且待後期賊
豈可盡乎饋琨馬牛羊各千餘車金百鎰又畱勁銳戍
之而還六年城盛樂以為北都修故平城以為南都帝

登平城西山望觀地勢乃更南百里於湟水之陽黃瓜堆築新平城晉人謂之小平城使長子六修鎮之統領南部九年帝召六修不至帝怒討之失利乃微服民間遂崩普根先守外境聞難來赴攻六修滅之普根立月餘而薨也

平文皇帝諱鬱立惠帝之子也二年西兼烏孫故地東吞勿吉以西控弦上馬將有百萬劉聰死淵族子曜僭立帝聞晉愍帝為劉曜所害顧謂大臣曰今中原無主

天其資我乎劉曜遣使請和帝不納是年司馬叡僭稱大位於江南五年桓帝后以帝得衆心恐不利於己子害帝遂崩大人死者數十人天興初尊曰太祖惠皇帝諱賀傳立桓帝之中子也未親政事太后臨朝遣使與石勒通和時人謂之女國使四年帝始臨朝五年出居於宇文部賀蘭及諸部大人共立烈皇帝烈皇帝諱翳槐立平文之長子也石勒遣使求和帝遣弟昭成皇帝如襄國二年石勒僭立自稱大趙王烈皇帝崩昭武皇

帝諱什翼犍立平文之次子也生而奇偉寬仁大度喜
怒不形於色身長八尺隆準龍顏立髮委地卧則乳垂
至席烈帝崩顧命曰必迎立什翼犍社稷可安烈帝崩
帝弟孤乃自詣鄴奉迎與帝俱還建國元年帝即位於
繁峙之北時年十九二年春始置百官分掌衆職八年
張駿私置假涼王十三年魏郡人冉閔殺石鑒僭立十
四年氏苻健僭稱天王自號大秦十五年慕容皝滅冉
閔僭尊號二十七年春車駕還雲中冬十一月討沒歌

部破之獲牛馬羊數百萬頭三十四年春長孫斤謀反
伏誅斤之反也拔刃向御座太子獻明皇帝諱寔格之
傷脇夏五月薨後追謚焉秋七月皇孫珪生大赦三十
九年苻堅遣其大司馬苻洛率衆十二萬朱彤張蚝音
鄧羌等諸道來寇侵逼南境冬十一月白部獨孤部禦
之敗績南部大人劉庫仁走雲中復遣庫仁率騎十萬
逆戰於石子嶺王師不利帝時不豫十月至雲中旬有
二日帝崩時年五十七太祖即位尊曰高祖帝雅性寬

厚智勇仁恕時國中少繒帛代人許謙盜絹二疋守者以告帝匿之謂燕鳳曰吾不忍視謙之面卿勿泄言謙或慚而自殺為財辱士非也

太祖道武皇帝

後魏書曰太祖道武皇帝諱珪昭成皇帝之嫡孫獻明皇帝之子也母曰獻明賀皇后初因遷徙遊于雲澤既而寢息因夢日出室內寤而見光自牖屬天歛然有感以建國三十四年七月七日生太祖於參合陂北其夜

復有光明昭成大悅羣臣稱慶大赦告於祖宗保者以
帝體重倍於常兒竊獨奇怪明年有榆生於埋胞之坎
后遂成林弱而能言目有光曜廣額大耳衆咸異之年六
歲昭成崩元年葬昭成皇帝於金陵營梓宮木材盡生
成林帝雖幼冲而巍然不羣劉庫仁常謂其子曰帝有
高天下之志興復洪業光揚祖宗者必此王也登國元
年春正月戊申帝即代王位郊天建元大會於牛川復
以長孫嵩為南部大人以叔孫普洛為北部大人班爵

叙勲各有差夏四月改稱魏王是歲慕容垂僭稱皇帝
於中山自號大燕姚萇僭稱皇帝於長安自號大秦六
年秋七月講武於牛川慕容永使其大鴻臚慕容鈞奉
表勸進尊號冬十月北征蠕蠕追之及於大磧南山下
大破之班賜從臣各有差十有二月出居于馬邑是歲
起河南宮七年秋八月行幸漢南仍築巡臺八年春正
月南巡二月幸殺羊原起白樓皇始元年春正月大蒐
於定襄之虎山三月慕容垂來寇桑乾川陳畱公元虔

先鎮平城時帝徵兵未集虔率麾下邀擊失利死之垂
遂至平城西北踰山結營聞帝將至乃築城自守疾甚
遂遁走死於上谷子寶迎喪而還至中山乃僭立秋七
月左司馬許謙上書勸進尊號帝始建天子旌旗出入
警蹕於是改元八月治兵於東郊大舉討慕容寶親勒
六軍四十餘萬南出馬邑踰于句注旌旗駱驛二千餘
里寶并州牧遼西王農棄城東遁并州平初建臺省百
官封拜公侯將軍刺史太守尚書郎悉用文人帝初拓

中原畱心慰納諸士大夫詣軍門者無少長皆引入賜
見存問周悉人得自盡苟有微能咸蒙叙用冬十月車
駕出井陘十一月進軍中山引騎圍之二年春正月饗
羣臣於魯口慕容寶遣其左衛將軍慕容騰寇博陵殺
中山太守及高陽諸縣令長抄掠租運是時信都未下
帝乃進軍引騎圍之寶將軍張讓護軍徐超率將吏以
下舉城降寶聞帝幸信都乃趣博陵之深澤屯滹沱水
遣弟賀麟寇陽城三月車駕次于盧奴寶遣使求和請

送元觚割常山以西奉國乞守中山以東帝許之已而
寶背約辛亥車駕次中山命諸將圍之是夜寶弟賀麟
將妻子出走西山寶見賀麟走恐先據和龍壬子夜遂
將其妻子及兄弟親族數千騎北遁城內共立慕容普
隣為主麟復入中山殺普隣自立九月賀麟飢窮率三
萬餘人出寇新市甲子晦帝進軍討之太史令晁崇奏
曰不吉帝曰其義云何對曰昔紂以甲子亡兵家忌之
帝曰紂以甲子亡周武不以甲子勝乎崇無以對冬十

一月帝進軍新市賀麟退阻泝水依漸洳澤以自固甲戌帝臨其營戰於義臺塢大破之斬首九千餘級賀麟單馬走西山遂奔鄴慕容德殺之甲申中山平丁亥遣三萬騎起衛王儀將以攻鄴天興元年春正月慕容德走保滑臺車駕幸鄴遂登臺遍觀宮城將有定都之意乃置行臺以龍驤將軍日南公和跋為尚書左丞賈彞率郎吏及兵五千鎮鄴車駕自鄴還中山所過存問百姓詔大軍所經州郡復貲租一年除山東民租之半車

駕將北還發卒萬人治直道自望都鐵關鑿恒嶺至代
五百餘里六月詔有司議定國號羣臣奏曰昔周秦以
前世居所生之土有國有家及王天下即承為號自漢
以來罷侯置守時無世繼其應運而起者皆不由尺土
之資今國家萬世相承啓基雲代臣等以為若取長遠
應以代為號詔曰昔朕遠祖總御幽都控制遐國雖踐
王位未定九州迨于朕躬處百代之季天下分裂諸華
之主民俗雖殊撫之在德故躬率六軍掃平土宇凶逆

蕩除遐邇率服宜仍先號為魏焉秋七月遷都平城始
營宮室建宗廟立社稷八月詔有司正封畿制郊甸端
經術標道里平五權較五量定五度冬十月起天文殿
十有一月詔尚書吏部郎中鄧淵典官制立爵品定律
呂協音樂儀曹郎中董謐撰郊廟社稷朝覲宴饗之儀
三公郎中王德定律令申科禁太史令晁宗造渾儀考
天象吏部尚書崔玄伯總而裁之十有二月帝駕臨於
天文殿太尉司徒進璽綬百官咸稱萬歲大赦改元追


尊成帝已下及后號謚樂用皇始之舞詔有司議定行次
尚書崔玄伯等奏從土德服色尚黃數用五未祖辰臘
犧牲用白五郊立氣宣贊時令敬授民時行夏之正徙
六州三十二郡守宰豪傑吏民二千家于代都二年春
正月初祀上帝于南郊以始祖神元皇帝配降壇視燎
成禮而反二月破高車以所獲之衆起鹿苑於南臺陰
北距長城東包白登屬之西山廣輸數十里鑿渠引武
川水注之苑中疏為三溝分流宮城內外穿鴻鴈池三

月初令五經羣書各置博士增國子太學生員三千人
秋七月起天華殿大閱于鹿苑饗賜各有差冬十月太
廟成遷神元平文昭成獻明皇帝神主于太廟三年三
月戊午立皇后慕容氏是月穿城渠通於城內作東西
魚池夏四月姚興遣使朝貢五月車駕東巡幸涿鹿遣
使者以太牢祀帝堯帝舜廟七月車駕還宮起大中殿
及雲母堂金華堂四年三月帝親漁薦于寢廟五月起
紫極殿玄武樓冬十二月集博士儒生比衆經文字義

類相從凡四萬餘字號曰衆文經六年冬十月起西昭陽殿乙卯立皇子嗣為齊王加車騎大將軍位相國是年島夷桓玄廢其主司馬德宗而自立僭稱大楚天賜三年九月幸漢南鹽池至漢中觀天鹽池六年夏帝不豫初帝服寒食散自太醫令陰美死後藥數動發至此愈甚而災變屢見憂懣_{莫困切}不安或數日不食或不寢達旦歸咎羣下喜怒乖常謂百寮左右曰人不可信慮如天文之占或有肘腋之虞追思既往成敗得失終日

竟夜獨語不止若傍有鬼物對揚者朝臣至前追其舊惡便見殺害其餘或以顏色變動或以喘息不調或以行步乖節或以言辭失措帝皆以為懷惡在心變見於外乃手自毆擊死者皆陳天安殿前於是朝野人情各懷危懼有司懈怠莫相督攝百工偷劫盜賊公行巷里之間人為稀少帝亦聞之曰朕縱之使然待過災年當更清治之耳冬十月帝崩於天安殿在位十四年時年三十九歲先時國有讖曰珪厄清河死萬人帝破滅清

河郡手殺萬人以厭之夜恒變易寢處人莫得知唯愛
妾萬人知處帝子清河王紹與萬人通懼罪同害帝帝
歎曰清河萬人乃是汝耶元帝立誅紹及萬人永興二
年九月上謚宣武皇帝葬於盛樂金陵廟號太祖泰常
五年改謚曰道武



太平御覽卷一百一